

Contrat da fusiun tanter las corporaziuns evangelicas da Lavin, Susch e Zernez/Brail

Las votantas ed ils votants

da la corporaziun evangelica da Lavin e da la corporaziun evangelica da Susch e da la corporaziun evangelica da Zernez/Brail

decidan minchüna in sia radunanza dals 2 october 2015 davart quist contrat e la fusiun da las trais corporaziuns evangelicas ad üna nouva corporaziun evangelica cun nom „*corporaziun evangelica da Zernez*“.

Artichel 1 – la fusiun da las trais corporaziuns

La corporaziun evangelica da Lavin, la corporaziun evangelica da Susch e la corporaziun evangelica da Zernez/Brail s'unischan in üna nouva corporaziun evangelic-refuormada cul nom *corporaziun evangelica da Zernez*.

La corporaziun evangelica da Zernez es commembra da la baselgia evangelic-refuormada dal chantun Grischun tenor art. 1 da la constituziun da la baselgia chantunala.

Artichel 2 – successura cumplessiva

La corporaziun evangelica da Zernez surpiglia tuot las relaziuns da dret da las trais corporaziuns unidas. La corporaziun evangelica da Zernez surpiglia tuot las activas e passivas e l'inter possess da fuond cun tuot las immobiglias e mobiglias, sco eir tuot ils dabuns e tuot ils impegn da las trais corporaziuns unidas (in quist lö surtuot eir tuot ils dabuns d'impostas).

Illas agiuntas al contrat da fusiun vegnan dombrats sü tuot ils posts qua sur manzunats da minchüna da las trais corporaziuns. Las agiuntas al contrat sun part integrala da quel.

La corporaziun evangelica da Zernez s'impegna per tuot ils obligs da mincha singula da las corporaziuns unidas cun seis inter possess.

La corporaziun evangelica da Zernez surpiglia al di cha quist contrat va in vigur tuot ils contrats publics e privats, sco eir tuot ils contrats da persunal da las trais corporaziuns unidas. Tuot ils contrats valabels al di dal müdamaint vegnan surtuts tals e quals sco chi sun.

Artichel 3 – nom e perimeter

La nouva corporaziun da dret public cumpiglia il perimeter dal cumün politic da Zernez e porta perque eir il nom *corporaziun evangelica da Zernez*.

La nouva raspada cumpiglia tuot ils commembers da la baselgia evangelic-refuormada illas quatter fracziuns da Brail, Lavin, Susch e Zernez ed insomma da tuot il territori cumünal dal cumün politic da Zernez.

Artichel 4 – organs da la corporaziun evangelica Zernez

Il temp d'uffizi da tuot ils organs tschernüts da la trais corporaziuns evangelicas unidas (consistoris, revisuors, rapreschantants) va a fin cul di chi va in vigur quist contrat. Per quel di vegnan tschernüts da la radunanza da la corporaziun nouva organs novs.

Fin a quel di mantegnan però ils organs existents lur plaina incumbenza cun tuot ils drets e dovairs.

Artichel 5 – dispusiziuns transitorias

a) realisaziun da la fusiun

Ils consistoris da las trais corporaziuns chi s'unischan vegnan incumbenzats cun approvar quist contrat culla lezcha da realisar la fusiun. Els han da pisserar per tuot las infuormaziuns necessarias e mettan a dispusiziun quellas als organs venturs. Els infuormeschan eir regularmaing als commembers da lur raspadas davart l'andamaint da la fusiun.

Il contrat da fusiun cun sias agiuntas vegn preschantà al listess mumaint a las trais radunanzas per til approvar. Nu vegn quel o üna part da quel approvà dad üna da las radunanzas, sto quella part gnir adattada e preschantada da nouv infra 6 mais. Ils consistoris da las trais raspadas han da pisserar in quel temp per üna proposta acceptabla. Nu grataja que – vala la fusiun sco sbüttada.

b) novs statüts

La proposta pels statüts da la corporaziun evangelica Zernez sun agiunts a la documanta da la missiva per l'approvaziun da quist contrat da fusiun. Els vegnan però fats bun a la radunanza da constituziun da la corporaziun evangelica da Zernez dals 18 november dal 2015. In quella radunanza vegn approvada eir la ledscha d'impostas da la corporaziun nouva ed i vegn tschernü il consistori da la raspada nouva. Quel dess avair in sia prüma constellaziun ün rapreschantant da Brail, ün da Lavin ün da Susch, ün da Zernez ed ün president. Ultra da quai vegn preschantà a la radunanza da constituziun eir ün preventiv per la corporaziun nouva.

c) approvaziun dals rendaquints, dal preventiv e dal pè d'imposta

Il quint da l'on curraint vegnan manats a fin da mincha singula da las trais corporaziuns. Ils organs respunsabels da las trais corporaziuns portan la respunsabilità da manar a fin il quint e da serrar giò quel e preparar il rendaquint. Ils revisuors da quint da la corporaziun unida revedan quel per mans dal consistori nov e da la radunanza generala da prümvaira da la corporaziun evangelica da Zernez. Il preventiv da sia vart vegn miss insembel cun preparar la fusiun e preschantà a la radunanza da constituziun.

Il pè d'impostas pel 2015 es gnü fixà da las trais singulas radunanzas da las corporaziuns da fin qua. Quel resta sco decis. Il pè d'impostas pel 2016 vegn lura preschantà a la radunanza da constituziun per gnir approvà. Que dess esser per tuot las fracziuns il pè d'imposta da fin qua per las fracziuns da Brail e da Zernez.

d) vigur da la fusiun

La fusiun va in vigur als 1. da schner dal 2016. Que culla resalva cha'l grond cussagl evangelic da sia vart approvescha eir quella.

Approvà da las radunanzas extraordinarias da las corporaziuns da Lavin, da Susch e da Zernez/Brail als 2 october 2015.

Per la corporaziun evangelica da Zernez/Brail:

La presidenta, Gabriela Angelini-Luzi

L'actuara, Angela Besio-Niggli

Per la corporaziun evangelica da Susch

Il president, Hermann Thom

L'actuar, Oscar Cuorad

Per la corporaziun evangelica da Lavin

Il president, Jachen Gaudenz

La suprastanta, Regula Bollier

Approvà dal grondcussagl evangelic dal chantun Grischun, als 11 da november 2015

Il president

il scrivont